

ginis Immaculatae. Per definitionem, quæ petitur, possit turbari, & imminui; surgent disputationes, tranquillitas Ecclesiæ turbabitur, auctoritas Pontificis impugnabitur, aliaque sequentur incommoda, quæ ex dicendis patebunt. Quare concludendum est, talem definitionem necessariam non esse.

XVI. Quamvis secunda pars resolutionis oriatur ex prima, quia in gravissimis causis Ecclesiæ, ubi auctoritas exercetur, quod non est necessarium, nec est expediens (non enim potestas suprema Principis est experienda, nisi urgente necessitate, & quando alter fieri non potest) tamen particularibus rationibus ostendemus, definitionem petitam non expedire. Antequam autem rationes proponantur, præmitenda est sequens historia facti.

Tempore Concilii Basiliensis fervebant disputationes, & pro utraque parte scripta divulgabantur, per quæ mentes Fidelium hærentes, quid credendum, quid sentiendum de Conceptionis Mysterio, nesciebant. Quare Patres Concilii inter gravissima negotia, quæ tractanda erant, hoc non negligebant, immo præ oculis habebant. Ut tamen in re tam gravi firmo incederent pede, Legati Pontificis, & Concilii Præses demandarunt Fratri Joanni de Turrecremata tunc Sacri Palatii Apostolici Magistro, ut pro rei veritate statum controversia aperiret pro relatione facienda coram toto Concilio. Obtemperavit religiosissimus vir, & arduam provinciam suscepit; incredibili eruditione, & immenso studio tractatum composuit, in quo primo præscribit regulas teneri solitas in definiendis hujusmodi controversiis; statum questionis aperuit, difficultates promovit, auctoritates tum Sacrae Scripturæ, tum Sanctorum Patrum una cum rationibus Theologorum collegit, plene, & abundanter satisfecit principalioribus objectionibus Joannis de Segobia ex adverso scribentis, relictis levioribus, & non ad rem pertinentibus; & tandem petit veniam, si non pro voto sapientissimorum Patrum scriperat; & rogat, ut questioni excitatae, vel excitandæ ponatur finis, obtemperarurus religiose definitioni, quæcunque fuerit.